

327  
142

默應和尚遺稿

全

古梅林藏板

327-142

默應和尚遺稿

全

明治  
42 11 18  
東京

古梅林藏板

凡例

一師在世六十餘年。對機垂示。臨時拈出亦多矣。然大概散逸。而遺稿所存者。僅數卷耳。因纂余等曾竊抄記者若干。合爲一卷。  
一手記稿本。以干支編之。而今揭上堂塔銘寺等日子。以類輯之者。爲令便于繙讀。  
一本年丁師十七回諱辰。因刊此編。供真前。且頌同臭。以欲涓滴酬恩海也。

明治四十二年十一月

纂者識

默應和尚傳

師名默應。字機外。別號懶雲。周防巖國藩士。蘆浦次右衛門第四子也。以天保二年辛卯十一月二十二日。生于玖珂郡今津邑。幼慧敏。恒喜禮佛。父謂此兒異庸。豈非僧伽之再生乎。乃欲令出家。師甫八歲。一日嬉戲。頓觀世間無常。已亥春。父遂拉師造邑之大應寺。禮萬仰和尚。薙染受具。習誦經咒。傍就醫士藤村三貞。受詩書句讀。庚子投豫州寶林寺雪安居會。依堂頭大愚囑。書寫正法眼藏。壬寅仰公携造巖國洞泉寺。謁字禪和尚。令受業焉。禪公一見器許。提撕頗切。翌年隨禪公。投宇和島高德寺兩安居會。始聽首楞嚴經。乙巳秋。遊方之志不能禁。遂不告師父。買舟赴上國。歷參福祥天瑞。石像宗桓。松原幽蘭諸老。

既歸省禪公及父母。嘉永元年春。參興聖回天。次隨禪公。往來畿甸。孜孜參究。辛丑冬。參清拙於丹之苗秀寺會。刀耕火種。晝夜勵精。十一月二十日初更。拙垂語曰。汝嘗聽首楞嚴經。七處徵心。八還辨見之旨。何物恁麼兀兀地。師豁然大悟。拙付偈曰。一笑區區入墨繩。機臻機外氣如鷹。誰人喚火曾燒口。無舌言端真默應。時師年二十一。自此機辯迅捷。莫當其鋒者。癸丑再參回天。叩末後牢關。天深肯之。秋省禪公於攝之大昌寺。則公疾既病。遂示寂。痛哭將絕。會回天亦先禪公五日。戔化。於是飛錫東都。掛搭梅檀林。分衛自活。隨愚禪彌白諸老。研鑽竺墳。傍就健齋梧樓枕山等。鉅儒學經史及詩賦。與傳苗默矣等。切磋三年。慧業大進。丁巳春。歸觀法兄默禪和尚於攝之退藏峰。有

詩曰。衣錦乘車元偉績。封侯佩印亦奇勳。爭如鉢錫猶無恙。歸去閑眠嶺上雲。翌年夏。依禪公命。首版於退峰。分座秉拂。提唱碧巖。一衆傾聽。己未三月二十日。遂入禪公室嗣法。時年二十九。是秋應攝州槻並福祥寺請。八月七日。進山開堂。翌春瑞世永平寺。歸省母。尋同道友。單靈。行化北陸及山陰諸州數年。慶應乙丑夏。歸轉法輪於福祥。爾後遐邇緇素。雲集座下。道化甚盛。明治二年。三田心月院虛席。應大檀越九鬼侯請。四月二十八日。進院開堂。法雷大震。六年補中講義。七年任兵庫縣僧司。九年任宗門大學教授。十年補大講義。十五年任縮刷大藏經校讐委員。後歷任宗門要司。又行化山陽山陰畿內東海北陸道。譽籍籍焉。二十六年六月二十四日。溘然坐化。世壽六十三。

師風貌清溫。操持純密。其講經論。節解句釋。諄諄不倦。然其尋常接衆。卓厲風發。棒喝雷雨。江湖龍象。無不悚服焉。而入其爐。韞者大約五百人。受菩薩戒。四衆以萬數焉。禪餘嗜詩。吟哦風月。又巧臨池。顏筋柳骨。遒勁絕倫。嗣法二人。曰忠山。曰文龍。所著有語錄數卷。

# 默應和尚遺稿

法嗣 蔭山文龍  
參學 弘津說三 共  
參學 山田孝道 纂  
參學 若生國榮

## 上堂

安政六己未秋。攝津國。川邊郡。槻井村。福祥寺。晋山法語。

山門

一字玄門。迥絕籬藩。等閑入得。獨步乾坤。不見道。玄之又玄。衆妙之門。

佛殿

以拂子指左邊曰。大悲代受。兮風拂大虛。指右邊曰。自在圓通。兮月浮萬水。指中

央曰。中間老比丘。有甚麼長處。仔細點檢來。則死貓兒。破犢鼻。便拜。

伽藍

峨冠珠履。聰聽明視。擁護法門。勿使委靡。

祖堂

落節西竺。拔本東天。一場狼藉。遺臭萬年。

開山堂

開山。恒山。書龍和尚。信心銘。夜塘水。著者。而天桂和尚。第三世之法孫。

夜塘水脈。自六瀨涓。波及湖海。沒溺孫兒。今掬其派者誰。周南赤蘿蔔。浪北黑烏龜。

祝聖

吉樹山頭松鬱密。福祥檻外水潺湲。拈斯不變無窮境。爲祝吾皇億萬年。

據室

三世諸佛。據個室轉大法輪。歷代祖師。據個室播揚宗教。天下宗匠。據個

室烹鍊佛魔。當山開祖。據個室激揚夜塘水。而沈沒天下衲僧。中興先師。據個室拽石搬土。以建立梵刹。乃至十道異類。無一不據個室而出氣。屙屎放尿也。應上座。如今日據個室。有甚麼生涯。良久曰。堪對暮雲歸未合。遠山無限碧層層。

視篆

不是鳥篆。不是蟲文。等閑印定。點畫自分。

索話

胡蜂不戀舊時窠。猛將不在家中死。還有同氣相應底麼。問答不錄。

提綱

至道無難。唯嫌揀擇。但莫憎愛。洞然明白。信心銘百四十六句。唯以此四句。一串穿却了矣。是誠三祖大師之皮肉骨體也。竊惟一切經論。古則公案。竟歸於脫揀擇憎愛之二念而已。苟得辨道修行。脫揀擇憎愛。則一切

處造次顛沛。世出世間。理事逆順。無不樂地也。若得至樂地。則常有進而物退矣。應也。被業風吹。投錫於此山。而卜行履。欲日夜以上來數語爲眼睛。故爲衆報耳。雖然。畢竟如何得恰好去。良久曰。長伸兩脚睡。無喜亦無憂。

自叙

應杜多。膽小才短。漫據棠蔭。負山蚊力。慚報何禁。

贊說

恭惟。本山堂頭老和尚。退峯本師大和尚。各枉象駕。寵臨弊室。恩顧之渥。知謝不知述。伏惟。諸山宗匠。隣峯耆宿。轉位就功。爲軸爲輻。恩賜鏤骨。感謝滿腹。復惟。方來雲衲。道舊霞袂。荷負無賴村僧。圓滿晉山嘉例。下情無堪感激之至。謝謝。

拈則

記得。當山開祖老和尚。昔日有三轉語示衆。一轉云。父母未生前。眉毛生那裏。山僧下語曰。拄杖長拂子短。二轉云。三世諸佛。依甚無佛性。下語曰。爲渠不成佛。三轉云。輪回三界。具什麼眼。下語曰。但念水草。餘無所知。師又曰。下語得第一轉。不得受他瞞。薦得第二轉。可與佛祖爲師。如第三轉。有一人具百千舌。舌有百千語。未抓着山僧痒處。在山僧適來下語。亦是隔靴抓痒。到這裡如何諦當。良久曰。向下文長。付來日。久立珍重。

結夏上堂

登座

諸方大尊貴生。吾這裡蝦蟆上荷葉。

拈香

祝聖。南閩浮提。豐秋津島。瑞穗國。某縣國郡村。某山某寺。住持傳法沙



門某。此日結制令辰。恭拈寶香。爇向御爐。端爲祝延。今上皇帝聖躬萬歲萬歲萬萬歲。伏願綿綿皇統。永與天壤無盡。赫赫國旗。高兼日月並明。高祖。這一瓣香。先天而生。後地而老。恭投金爐。供養勅特謚承陽大師。佛性傳東國師高祖老和尚大禪師。以酬恩海之一滴。伏願異香薰繡。穿却五家七宗鼻孔。德澤波及。浸潤四海五湖。緇流。官僚。仁者以之謂之仁。智者以之謂之智。貧道以之爲戒香。爇向爐中。奉爲大政官下文武百僚。及本縣令公。大小官屬。共願翼戴王室。世稱桓文九錫之功。鎮撫國家。民歌周召二南之化。開山歷住。這香。皮膚脫落。唯有一真實。恭拈出。供養當寺開山某大和尚。及歷住諸大和尚。伏願祖燈增焰。檀信傾誠。本師。這香。祕而不藏。顯而不彰。信手拈出。供養我本師某大和尚。奉酬法乳之慈恩。伏願大寂定中。垂慈愍之眸。蓮華臺上。開愛撫之顏。

索話

鐘不敲則不鳴。鼓不擊則不響。此裡有唱拍相應底。出來商量看。

提綱

虛空剝窟籠。禪板蒲團正好圖睡。大地絕遮欄。木馬泥牛。一任嘶吼。一念萬年。眼睛霹靂。十方目前。鼻孔累垂。恁麼相應。則諸仁者受貧道皮肉骨髓。結跏。貧道依諸仁者行住坐臥行持。還體悉得麼。良久曰。偏正不曾離本位。無生那涉話因緣。

自叙

某上座。叢林樛木。百不可取。三省己分。冷汗溢背。

謝語

恭惟。本山堂頭大和尚。遠托象駕。貴臨弊會。雲林改觀。山水生光。下情不堪感激之至。

伏惟。某老和尚。拈起金鎚。莊嚴弊會。道誼之厚。鳴謝何罄。  
又惟。同盟宿德。法緣耆年。山門兩序。四來雲衲。屈尊就卑。爲法忘身。恩  
誼鄭重。何日得謝。

拈則

記得。高祖承陽大師曰。九十剋期明日始。莫於繩墨外邊行。蒲團倚坐  
無他事。終日寥寥賀太平。此是承陽大師之鼻孔眼睛也。雖然如是。貧道  
亦辱遠裔。如何得不向繩墨外邊行。拂一拂曰。大眾若坐。隨衆而坐。大眾若  
臥。隨衆而臥。伏惟衆慈。久立珍重。

示衆

丙寅夏伯耆田中雲祥寺小參示衆

水走雲奔箇箇僧。同依此地弛擔登。三春蝶夢惺惺着。須準祖規守墨繩。

四月朔小參示衆

汲泉幽谷流無盡。採蕨深林食有餘。法喜况還添禪悅。騰騰結得好安居。

除夕示衆

懶雲到處共雲眠。空送一年又一年。宿債依然償不得。好咬莖菜伴南泉。

明治改元戊辰元旦示衆

梅弟松兄竹丈夫。各分賓主絕疎親。雪晴朶朶湖山曉。新展蓬萊活畫圖。

辛未冬田中村神明庵小參示衆

田中秋已熟。車瀨水長流。好伴瓶兼鉢。三冬此寄留。

結冬示衆

回避梅林寒苦切。寄蹤車瀨下流清。爲報同行萍寄客。去留莫使帶根生。

解制示衆

挂囊秋露結霜日。轉錫春風解凍時。中間九十爲何事。檢點娘生一兩肩。

戊寅夏雲州西比田常福寺小參示衆

松江水與浪華濤。涇渭無分斯混淆。好作純然清淨海。九旬風穩不勞篙。

結夏示衆

建德山號

百福常圓名不空。二時粥飯極精豐。九旬修證毫無味。宜報檀施建德功。

五月一日示衆

唯斯一寶大因緣。開示明明絕黨偏。朝暮三千還八百。牛車轆轤得周旋。

五月十五日小參示衆

九十光陰三十過。脚跟進步且如何。由旬五百何曾遠。實所先登勿讓他。

六月十五日小參示衆

鑿井知泉近。繡衣覺玉新。濕原無擇地。醒醉莫憂貧。

七月一日示衆

天上暑雲簇。林邊梧葉飄。分陰須護惜。節氣未曾饒。

解制示衆

雙脚駕雲輕鉢盂。滿肩擔月璨衣珠。區區不用窮途哭。無限秋光滿五湖。

巳卯夏丹後由良松原寺小參示衆

餉得頻伽瓶裏空。勢南丹北駕春風。報知各自安單客。鼻孔累垂擬竹筒。

五月一日結夏示衆

先是有數輩退席者。故及。

衆無枝葉存貞實。機脫糟糠見本真。好作毘盧清淨海。純然鹹味絕疎親。

六月一日半夏示衆

唯依佛祖坐禪儀。琢出娘生活面皮。動靜云爲毫不味。初中後善莫遲疑。

普放山結冬示衆

結社何嫌衆約豐。朔羊聊慕古人風。大機大用休他覓。青女歸楓獨綿紅。

解制示衆

結一圓兮解一圓。一圓相裡絕親疎。身心瀟灑能如是。觸處生涯蓮不如。

五月五日示衆

徧界都盧藥一枝。病魔何處得相窺。堪嗤大智財童子。兩兩三三誑小兒。  
臘朔示衆

歲月推移到臘天。猶餘三十好揮鞭。慇懃預向諸人報。莫被閻王責飯錢。

### 塔銘

壬戌今津海光寺法華千部會塔銘

日浮海面白毫光。風鼓潮音舌相長。即是南方無垢界。唯常宣說此經王。

巳卯夏松原寺尸羅會塔銘

松原添翠梳螺髮。野菜布金開戒場。退後進前高着眼。分明呈露舍那光。

瑞光寺塔銘

瑞光高放照靈臺。胡漢分明現影來。各自揩磨毫不味。安居日日絕塵埃。

心月院開祖忌塔銘

西山磨出無縫塔。秋月照來常寂光。誰謂乃翁曾滅度。儼然面目露堂堂。  
甞。從來我不隱于爾。二株嫩桂久昌昌。

寶泉祖海和尚七周忌塔銘

寶泉流潔祖海波揚。森羅印影萬象放光。藏舟夜壑。七經星霜。却來而日。  
徧界不藏。羽束風冷。泉曲月涼。無縫塔樣。山高水長。

### 像贊

釋迦文佛贊

白毫光遍。照破大千。不說舌相。今古熾然。

文殊菩薩贊

動靜云爲。獅吼無已。拈起如意。指揮大智。

普賢菩薩贊

手裡經卷。果是何章。步步回顧。自問象王。

圓鏡贊 有文殊普賢畫像

一圓鏡裡。各展家風。光光相映。主伴無窮。 唵。拈經卷處微塵破。揮智  
劍時天地空。

文殊大士贊

金毛獅子。自在驅馳。沒柄如意。自由指揮。 唵。大智光明絕邊際。人人  
脚下亦如斯。

前蓮光和尙請歷住增福光明安養之三刹祖印貫能老師  
肖像贊

兔角杖拈無印印。龜毛拂證不能能。誰知血脉貫通處。挑出蓮光續祖燈。  
唵。安養風流愛顛酒。孫謀餘福到今增。

出山相下懸崖過橋圖

削壁千尋摩半空。懸泉一道曝長風。今時久遠本成佛。出嶺過橋賊後弓。  
八雲宇浪村妙心見龍和尚肖像贊 師與余舊盟也。能畫梅。其徒未  
兆。向未寫真以前請贊。故及。  
真龍何處在。要見太遲遲。縱向未兆覓。渾沌畫兩眉。 唵。妙心寺畔黃  
昏月。寫出橫斜影一枝。

出山相

雪山山裏野狐精。謾叫一朝道始成。從是許多皮袋子。作群成隊惹疑情。

宣疏

道舊疏

武陵州世田谷大谿山豪德禪寺虛主席。請攝州退藏峰雪巖禪師。禪  
師不獲止起。乃以今月良辰。晉院開堂。某嘗辱交誼。遙聞此盛舉。不堪

欣抃。緝詞裁疏。以伸厥賀。

山目大谿。由來武陵法窟。寺號豪德。實是英檀福場。苟非擇彼間世之偉才。安能酬此護法之恩庇。

恭惟。新盟白堂雪巖大和尚。

寶林拔萃。靈楠孤標。宇治川上。截流先登。龍海會中。分座說法。爪牙猛如虎。眼目俊似鷹。是故。泛一葦於河內也。無邊風月。眼中明。卓孤錫於洛西也。不盡乾坤燈外熾。耕破不萌地。泥牛吼退藏雲。拽回不動機。木馬嘯永井月。事理圓融。宗說兼通。加之。適天命維新之運。誰膺禪風復古之仁。竿木隨身。攬玉川作酥酪。關楨在手。變碧雲爲黃金。請速拈一瓣。以高祝九重。

維明治三年龍舍庚午某月穀旦。同盟住浪北清涼山心月院乞士默應。稽首拜疏。

福昌三世柏巖和尚一周忌疏

寶明空海。湛死生漩澗之波。大寂定門。融今古去來之相。仰冀真慈。俯垂照鑑。

南閩浮提。大日本帝國。兵庫縣。攝津國。八部郡。西柳原町。延喜山福昌禪寺。燒香比丘某等。本月斯日。伏值當寺三世中興法幢。開闢柏巖苗大和尚一周忌辰。謹請諸山耆宿。集闔山清衆。恭就真前。諷誦經呪。所集殊勳。上酬罔極慈恩者也。右伏惟。

辭此黛色。虬龍參天而蟠。纂者曰。二句謂柏字。節彼屏顏。虎豹臨風而吟。纂者曰。二句謂巖字。蓋

以境藉人顯。名資實傳。

恭惟。當寺三世柏巖大和尚禪師。

若耶溪頭。其師別號早拔岐嶷之質。夜明簾外。和向別號頓參辛辣之禪。截斷葛藤

于檀林。睥睨富嶽千仞之雪。該羅教網於台麓。吞吐琵琶湖萬頃之波。天人

捧華陪筵。龍女獻珠聽法。於是拓榛翳地。立兵庫要津關。轉般若林。興福昌常恒會。深信檀越有待。輻湊境致無遮。樓閣巍峩。如阿房宮。蟠咸陽府。殿堂輪奐。似兜史闕。聳須彌峯。何妨鑄甲山。變黃金。直得攪湊川。爲酥酪。加旃。示十說。謂著宗門十說于叢林。則衲子開眼進步。指一針。謂著露海南針於霧海。則邪徒喪膽銷魂。振英名十方。董師席兩刹。可謂佛天女媧氏。緇門叔孫通。雖遷化於他方。凜乎如在。况樹功於觸處。磨而不磷。茲值一周之忌辰。聊擬三轉之消息。恭願俯鑑兒孫微悃。勿斥溪蘋之羹。仰望真慈。賁臨。尚享巖茗之供。謹疏。

永澤開山通幻禪師五百回諱疏

淨法界身。本無出沒。大悲願力。示現去來。

南閩浮提。大日本帝國。攝丹境。青原山永澤寺。燒香比丘某等。某年某月某日。恭值開祖古佛大和尚禪師五百回大遠諱。特開尸羅場。修諸

般白業。此日謹設菲薄之奠。諷誦大佛頂萬行首楞嚴神呪。以酬罔極慈恩者也。右伏惟。

降神豐城。靈光早射斗南。掛錫大乘。勝幢已繖加北。坐斷峩山絕頂。豁開總持玄關。於是英檀插草。建活伽監。神籠稟戒。得大解脫。活埋坑裏。撞入無氣息人。枯木堂前。燒却有學解漢。勅黃特作洞上僧錄。禪緇忽爲天下叢林。門庭嚴森。四處瑞松垂蔭。爐鞴辛辣。十員鐵額放光。仰想凜凜風裁。俯感赫赫慈蔭。茲遇半千遠諱。兼開三聚戒場。供以黍稷之餐。薦以蘋蘩之菜。伏願華藏界中分身周遍。珠網殿上萬象森羅。謹疏。

福泉開山忌疏

淨法界身。本無出沒。大悲願力。示現去來。仰冀真慈。俯垂照鑒。

南閩浮提。大日本帝國。北陸道。若狹國。遠敷郡。府中村。興府山福泉禪寺。燒香比丘某等。某年某月某日。伏遇當寺傳法開山廓峯然大和尚

七周諱景。莊嚴道場。謹具疎羞。恭就真前。諷誦白傘蓋神咒。所集殊勳。上酬罔極慈恩者也。

建法幢興宗旨。須英靈人。攀祖席躡高蹤。豈凡庸漢。

伏惟。當寺傳法開山廓峯然大和尚禪師。

巍峩道容。嶮於庚嶺之嶮。浩蕩德澤。深於雲濱之深。卓錫大光也。勢如杲日麗天。掬泉藤井也。機似庖丁解牛。左轉右轉。山色水光。現清淨身。言端語端。溪聲樹影。展廣長舌。鼎命遠降於諸嶽。鶯登總持門。象駕嚴臨于五山。單佩如意印。度生說法能隨處。出處行藏自適時。戢化殆七星霜。赤肉未朽。遺愛及二株桂。靈骨猶存。野茗園蔬。表獻芹之志。心香秘咒。瀝傾蓋之誠。仰願。道眼絕翳。憐兒回寂定中之夢。慈懷無私。忘醜現聲色外之儀。謹疏。開祖炳鑒。慈悲容納。

維明治十六龍舍發未六月七日。燒香比丘某等謹疏。

## 香語

鐵笛倒吹開講

一枝鐵笛。當面拈呈。入窓山色。穿耳蟬聲。

佛祖三經開講

救病好良藥。示方指南針。一兩聲杜宇。躑躅染新林。

全講了

誹謗如來正法輪。瞞頂乃祖肉團身。果然難免彌天罪。生作無間墮獄人。

從容錄開講 箭送山地名

箭送山頭弄弦筈。毘盧峯下破重圍。縱令百發皆相中。辨的還他嚙鐵機。

永平清規開講

偉矣諄諄宗祖規。兒孫誰是不依隨。寒溫動靜親修證。脫落身心非別時。



妙經開繙

山梳螺髮舍那粧。風送溪聲舌相長。常轉法華親聽取。白牛車上好徜徉。

永平清規開講

列聖眼睛。衲僧骨髓。動止威儀。猶魚在水。

梵網經古迹記開講

法門帝珠耀。心地白蓮開。光光無主伴。藥藥絕塵埃。

同講了

戒珠璨爛。大小渾圓。漫加彫琢。罪過彌天。

永平家訓開講

水色山光活眼睛。鳶飛魚躍自分明。諄諄遺訓須銘骨。滿地兒孫從是生。

普勸坐禪儀不能語開講

不能之語。鳥啼花笑。非思之量。龍吟虎嘯。

碧巖錄開講

猿抱子歸青嶂後。鳥啣花落碧巖前。誰知宛爾夾山境。移在伯陰金谷邊。

維摩經開講

侍者魔軍。彈呵狹劣。敗種生芽。虛空吐舌。

同講了

一聲霹靂激青天。聽者聾兮見者眩。昨夜秋風掃殘熱。十分爽氣滿山川。

鐵笛倒吹開講

一枝鐵笛響徹山河。要聽便聽。傾耳差過。

同講了

不穿疑石與迷雲。却爲衲僧堪結冤。爭似村童拈牧笛。冒煙吹過夕陽村。

輔教編講了

諄諄明教赤心腸。一掃迷雲揭太陽。倚賴四依菩薩子。挽回佛日照扶桑。

大智偈頌開講

新豐那一曲。傾耳便支離。富嶽雲重疊。琵琶水渺瀰。

參同契寶鏡三昧開講

參同契符。包裹寰宇。寶鏡光輝。照破千古。

從容錄講了

陳爛百枚閑話頭。妄談虛說結怨讐。果然招得無間業。借問于今有舌不。

法華講了

十方唯有法華經。轉轉分明末暫停。天上暑雲猶不散。早知秋氣透紗櫺。

咦。不信更移禪榻。見芙蓉閣外白蓮馨。

明教孝論開講

論孝至矣。二六成章。慎終追遠。獨最覺皇。

若州杉山清月寺轉般若會

二八應真駕雨輕。杉山深處叩同盟。滿盤湯餅併吞去。轉轉轉來般若經。  
灣。嶺松蒼鬱千年綠。江月玲瓏萬古清。

小濱空印寺普度會

直拈北海作慈舟。蕩把南山成寶樓。情與非情乘此運。空來彼我得優遊。

播州海久寺結制入寺

覽水鷺鷥侶。又來海久遊。飛揚無繫絆。出沒好隨流。

山中光明寺開山忌

楓葉粧紅錦。溪泉續斷絃。老師真面目。觸處自清新。

臥虎山松林寺大震雷和尚廿五回忌

一自法雷震此門。人天幾箇喪精魂。星移五五圓通曉。檻外山高臥虎蹲。

潭。樹凋葉落深秋節。別見松林添翠繁。

泰養寺世代年忌

爲玉山智泉實源洪道。天外秀峯三師。

皎潔智泉從玉山。實源湛湛道難攀。要看主伴來儀面。天外秀峰栽錦斑。  
響。三徑未荒霜後菊。芳馨依舊護禪關。

高巖山常福寺承陽講

常福流無盡。高巖推不摧。承陽真面目。壑塞又山堆。

爲戒源師字禪和尚設齋

浪華江畔起波瀾。錦帶橋邊收釣竿。戒源畢竟來何處。雨後溪聲噴雪寒。

歎佛會滿散

請看楊枝清淨水。終爲甘雨洒三千。直下消除煩惱熱。四衆同登車大蓮。

嘆。布施持戒已圓滿。錦上鋪花一段鮮。

尸羅會設齋

一國一華一釋迦。眉毛相結絕欄遮。不信人人看脚下。戒珠皎潔點無瑕。  
露。誰識此間真極樂。四衆歡喜笑談譁。

成道會

不見星兮不下山。依然端坐白雲間。請看六甲山頭雪。半積半消黃面斑。

尸羅會滿散施食點茶

掬得寶泉那一滴。直和芳茗點壇前。豈唯群類療飢渴。醒覺無明長夜眠。

嘆。歸去來兮諸戒子。陸行有馬水行船。

達磨忌

會成撥客干梁王。又化餓人臥片岡。千古兒孫稱祖禰。綿綿不免惹餘殃。

斷臂會

雪沒腰間三尺強。淚凍眉際幾千行。兒孫堪愧酬恩意。夜坐纔添數炷香。

嘆。此去少林會不遠。半輪白月照僧堂。

轉般若

夜來沛雨灑山川。草木叢林色色鮮。看看摩訶般若力。無思無智絕中邊。

響。六甲山頭雲變黓。三田城外水潺湲。

涅槃忌

娑羅林即是梅林。開落依然絕古今。中有黃衣釋迦老。喃喃唱出涅槃音。

佛生會

不從兜率天邊下。豈自摩耶胎裡生。一旦虛空無顯晦。任他雲雨弄陰晴。

心月院開祖忌逮夜

麥黃秧綠。畦服爛斑。一聲杜宇。啼過西山。

同獻粥

穿霞汲井華。和月煮新茶。一味沁胸膈。覺醒大那伽。

同午時

開基不易守成難。况遇外魔稱異端。猶爲乃翁陰德碩。梅林結果玉團圓。

應供會

猛虎呼風林外嘯。大龍驅雨鉢中跳。請看尊者神通力。頓使福田長惠苗。  
響。雨過溪聲大。雲低山色饒。

尸羅會本尊上供

一華百億國。一國一釋迦。各坐菩提樹。一時成佛陀。

成道會獻粥

蓬頭垢面。蘆膝鵲肩。曉出山去。飽誑人天。 咳。久遠實成本來佛。再來  
不直半文錢。

慶昌十世聯芳祖燈和尚祥月忌

祖燈挑熠霜天月。法苑聯芳雪後梅。此日年年辨齋供。來儀不吝笑顏開。

自牧十三世活文泰嚴和尚一周忌

白牛山上脫籠頭。快活生涯有孰儔。千丈泰巖人不見。轉身異類沒蹤由。  
咳。炎天六月難迴避。熱殺師兄枯燭髓。

小食

欲量來處應其供。香飯遠從杉谷中。施受作麼端的去。瑠璃殿上月玲瓏。  
露。凜乎霜色白於雪。颯爾風威利似刀。

就湯谷福泉寺點心

福泉隨杖湧。湯谷應聲鳴。應供真三昧。洞雲脚下生。  
然景。一幅丹青畫不成。

就木代北斗庵點心

誰道斯庵小。舍容北斗光。同心信施德。福聚海無量。

雲蓋石叟和尚祥月忌

風旋盡地。雲蓋闔洋。乃翁面目。無處不周。

分衛就甘露寺點心

行盡山村數里程。亂鶯語和鉢盂聲。大哉隨喜同心力。飯馥上方甘露城。

登寺田村青峰寺應供

寺田村是福田鄉。應手打開無盡藏。請看同心信施德。峰巒朵朵醉蒼蒼。  
分衛到上津蓮華寺點心

踏遍山阿與水涯。芒鞋鐵錫弄烟霞。誰知妙用神通力。直到上方兜史家。  
露。箇箇頭懸寶冠髻。人人脚踏白蓮華。

退藏二十世大應覺典和尚十七回忌

能宣覺王典。大應群品機。勿謂過去久。舌相尚依稀。  
齋聽。山鹿呦呦度翠微。

達祖忌

凜凜乃翁面。親近直須看。楓葉錦衣麗。菊花碧眼寒。  
瘞得半彎初月落簷端。

同午時

溼。

隻履依然難

面目堂堂老缺齒。不來東土不西歸。請看鏑射峯頭錦。猶帶聖皇恩賜衣。

聯山祖芳和尚二十五回忌

聯芳祖室振宗風。結果梅林樹偉功。戡化西天瓊浦外。年光五五此相逢。

響。慈雲垂地浪華北。法旆飄空車瀨東。

就若槻氏爲虎洲居士轉般若

五蘊皆空四大然。病魔何處得相纏。薰風一陣生香閣。簾外幽篁轉碧鮮。

響。頑雲癡霧消除去。無限靈光輝大千。

爲壽山大量大和尚設齋

壽若泰山不可刪。量如北海水煙寬。報恩端的如何委。高豎法幢修戒壇。

露。請見阿爺餘澤遍。爲風作雨透層巒。

修寶樓閣

枇杷苑林熟。踞躅石屏開。好斯寶樓閣。聚會絕安排。

爲醫士池田哲郎轉般若以謝施與清衆醫藥

施藥療人病苦。仁慈何以加焉。回斯般若功力。以祝子孫永年。

施食會

多謝天龍護法情。權衡隨意領陰晴。請看夜來浸潤雨。頓療飢渴慰蒼生。

爲孤峯兀立和尚設菜

孤峯突兀立雲間。雨後青螺梳翠髮。今古依然無變色。八風不動舊時顏。

露。松江攝水不相隔。影印清波月半彎。

施食會

密雲彌布界三千。梅雨連朝自油然。卉木叢林同好茂。人華敷實轉新鮮。

喚。以此修行善根力。使先亡駕大車蓮。

總光寺開山不見妙見和尚祥月忌逮夜

活埋坑裏。踔跳大機。美名千古。月潔日輝。露。要拜堂堂大人相。山螢

明滅照禪扉。

轉般若 龍蟠龜嶽  
境名

龜嶽祥煙簇。龍蟠溪水寒。總光般若德。普使智愚看。

午時大拈香

間生古佛絕齊肩。五百年來德澤傳。不見誰知真妙見。靈光照破界三千。

響。瑞洞山前雲出沒。龍蟠橋下水潺湲。

觀音心道和尚為本師某和尚十七回修供艱速夜

雨足溪聲大。風清夜色多。阿師應供面。竹外露婆娑。

午時獻供

觸處會心英邁師。展開兩手立宗基。餘慶覆蔭孫謀在。雨後溪聲噴雪奇。  
響。夢醒十有七年曉。山色胡盧展笑眉。

為清臺院心蓮乘養居士修施食會

甘霖洗炎熱。涼氣滿清臺。安養會非遠。蓮華心地開。

七日為小林氏修施食法

法雨濕時貪火滅。慧光輝處愛河乾。誰知藏眼二童子。頓使阿孃登佛壇。  
嘆。請看寶樓閣中樂。清風拂熱絕遮欄。

為溪水無潭和尚因事轉般若

妄雲纔喝散。廓落朗乾坤。溪水無涓滴。因何印月痕。

施食會

澍甘露法雨。滅除煩惱煙。業海風波穩。性天心月圓。響。寶樓閣上清  
風起。脚下薰飜車大蓮。

八月朔於安來洞正院開戒會

風罷波平小錦江。慈航浮得幾艘艘。十神千佛來臨此。加被摩尼最勝幢。  
二日小食

此岸舟兼彼岸舟。合同維繫棹清流。請看無礙圓通樂。順逆都來得自由。

午時細井內  
田地名

細井源深泉不盡。內田苗秀實將登。此斯積善餘慶德。況作財施挑戒燈。

第四日朝

信心德顯稱名聲。隨喜功成二利平。請看因圓還果滿。人人脚下白蓮清。

第五日為松源二十二世湛堂玉泉大和尚

湛湛松源深且長。堂堂面目軟而剛。誰謂王泉流已盡。錦江江外泛慈航。

第六日午時

松江水入錦江流。浮得度生悲願舟。四衆逍遙乘此裡。相呼相喚下滄洲。

八月十一日於米子大龍山總泉寺開戒場

米子秋登華藏界。錦江波泛大悲航。三千諸佛看風棹。八百萬神和葆光。

為再住總持了愍道和尚

再住總持挑祖燈。舉揚禪道結怨憎。大慈悲愍心無限。常轉法輪最上乘。

為本然自空本質妙空兩靈半百回忌  
十七回忌

半百回兼十七回。眉毛相結上蓮臺。本然空裡無今古。妙質圓明絕去來。

十二日志主鹿島氏

米子街頭長者家。施僧供佛最堪嘉。請看歸依三寶德。鹿島深沈擁翠霞。

嘆。妄霧散邊紅日耀。戒珠璨璨絕疵瑕。

又

秋風吹度錦江頭。浮得大悲弘誓舟。此岸人兼彼岸客。去留自在伴閑鷗。

嘆。十方佛土一乘法。等脫怨親駕白牛。

又

微雨朝來浥客塵。淨除心地六根新。六根新轉真如月。元是自家最上輪。

第四日下午應供會



大龍呈瑞聚慈雲。猛虎生風拂暑氛。感戴護持遺法德。檀波飄處戒香薰。

開山龍巖祖。吞和尚二百回忌。

龍巖龍躍自騰天。瞥過星霜二百年。今日風雲重際會。凜然毒氣逼人羶。

嘆。屈曲巖松鱗骨老。玲瓏海月驪珠鮮。

又

龍巖真龍現。雲雨吐還吞。二木兼三草。等沾大小根。嘆。以斯持戒加行德。欲報真慈罔極恩。

略戒場七日小食

黃梅花落緋桃開。春色更番成趣回。箇箇莊嚴華藏界。人人模出活如來。嘆。山色海光多變幻。一晴一雨趣奇哉。

己卯夏到着丹後松原寺本尊前

三十年前寓此間。再來今日禮尊顏。依然不改松原綠。却笑山僧兩鬢斑。

四月十二日開戒場迎真

雨霽雲收海面開。莊嚴華藏妙樓臺。三千諸佛此來現。如去如來絕去來。

佛生會獻粥

上天下天。多少落魄。托胎出胎。一場狼藉。

同午時

虛空藏  
山名

不自天降不地生。虛空藏裡碧崢嶸。九龍昨夜噴香水。灌沐金軀別樣清。

庚午九月轉般若

大智光明無易難。周遍六大絕遮欄。誰知轉轉家常事。坐臥經行珠走盤。

心月十三世天然智龍和尚百回忌。十六世玄龍大悟和尚

五十回忌。同修祭奠。

半百回兼單百回。眉毛相結得追陪。定中消息無今古。天色水光秋一枚。

響。昨夜雙龍爭玉去。月殘西嶺影徘徊。

# 偈頌

廓元禪友與余同學旃檀林。今茲己未夏。任吉祥寺首座。今也任滿而還。取途浪北。訪單靈法兄於退藏峰。遂過弊廬。因賀其盛舉併贈別。

冷笑諸方鬧熱禪。武陵原上弄雲烟。香壇分得吉祥座。學海駕來般若船。山驛夢驚風樹老。江樓月話鶴鷄緣。前程猶遠君無弛。荷法重任付兩肩。

祝鶴雲道友瑞世併贈別

欽子雲蹤迹。天邊與鶴閒。忽朝何豎髮。應是雨人間。

山房偶作次乾良平韻

歲月駸駸去不還。半生飄蕩老塵寰。昨非今是終何事。宜伴懶雲眠北山。

寄乾良平

寥落幽溪少往還。松霞竹靄擬仙寰。君家自有丹田地。何用鑄銅向蜀山。

首夏山房偶作

山門相接野村中。僅界閒忙地一弓。躑躅花殘留粉蝶。琅玕枝嫩引清風。誦經聲接秧歌起。登塔路兼樵徑通。誰識此間生計別。心田耕得占年豐。

寄單靈道友在江之松泉

往事都成夢。春風又一年。論禪熬店雪。分飯瓦爐煙。驛使看梅發。音書費雁傳。遙思踈隔月。煮茗汲松泉。

送全棟子

路遠蒼江三百里。雪遮吳地七十峰。勸君行到水窮處。放下烏藤看化龍。

臘朔賦似二三子

鷓巢冷淡伴霜嵐。扶我三冬嘗苦甘。梅弟竹兄爲尚友。寒山拾得是同參。道耕平地蔬三畝。默坐照心燈一龕。時節因緣毫不味。花枝將看暗香含。

辛酉與單靈兄將赴北越題壁

衲衣披展三千界。瓦鉢并吞六十州。有人若問吾消息。指點天邊雲自由。

訪單靈兄於西江途中作

風花煙柳鳥相呼。忽理輕筇訪友于。未到先知連夜夢。冠山枕水是君廬。

西江途上吟

元無塵累引。豈有利名羈。泉石困來憩。風雲到處隨。花開金世界。湖照玉玻璃。滿目多佳景。行行適所思。

北遊漫吟

鐵錫飄然伴遠征。花間鳥外一身輕。芒鞋踏遍加能越。竹笠穿過風雨晴。半嶺未逾猶鈍漢。百城已歷太遲生。此行至竟非那事。雲約水期償素情。

詠松賀普門堂頭國定師轉法輪

有松有松在須原。獨立亭亭鎮普門。其根貞固誰得拔。其幹礫礫不可捫。

材名曾自施武昌。檀林草木失色香。清籟時掃鬚鬢綠。恰如波濤來大洋。就之錯落望之美。大椿散樗何足比。臨濟榜樣小禪機。秦皇封爵兒戲耳。天外別有高標格。九夏幾群棲仙鶴。仙鶴依之得所安。清唳戛然飛又躍。

詠龍賀智寬首座

神物曾生魚沼濱。久游張海化金鱗。須原郊外遭燒尾。廣瀨灘邊解轉身。爛璨領珠欺日月。崢嶸頭角出風塵。拏雲起雨元能事。況在於田見大人。

高樓坐月

月白風清氣似秋。低吟淺酌屋簷頭。也知有客同良夜。玉笛聲飛何處樓。

風月樓

多謝煩君幾上樓。爲添興味更清幽。吟詩宜是消長夏。賞月何須期素秋。斷續蛙聲隔林聽。滅明螢火掠簷流。風光又與前宵異。欲把新題入雅遊。

分衛

衲僧半百一溪中。托鉢煙村西又東。聽水看山觀自在。駕雲乘雨妙神通。  
三輪空處圓施受。六度滿時亡富窮。箇是頭陀好蹤躅。今人何讓古人風。

河中島

朝嗽閃爍茶春嶺。宿霧冥濛妻女山。兩將雌雄猶未決。餘威烈烈滿人間。

松本途上

郊原一路曲如弓。禾黍垂垂日正中。數里長亭無野店。壩松樹下得清風。

信山道中

信山凸凹路高底。一壑纔過又一溪。蕎麥花開磽确地。人家徃徃與雲齊。

義仲城趾

白旗新樹映朝嗽。捲地唯將一併吞。可憫霸圖終不就。蘇山空見舊基存。

浦島釣臺

昔人一去已千年。陳迹猶留古寺邊。我至盤桓尋往事。澗流峭石吐蒼煙。

登丹波宗蓮寺

白雲深處四無隣。占得高閒披棘榛。若樹若林標實相。一丘一壑寫天真。  
嵐光烟影如非故。鳥語風聲亦覺新。誰謂偏成泉石癖。遊心劫外氣常春。

山中偶作

林間卓錫養癡惑。破衲深埋雲一龕。物外幽閒人不會。松風蘿月是同參。

豐公按摩圖

七道久分離。群雄各鼎峙。韜畧誰得全。獨有豐臣氏。安危定指呼。榮辱忘  
悲喜。一朝獵狗馳。中原狡兔死。會盟將有日。當仁執牛耳。鬼公胡爲者。使  
彼撫摩髀。側臥若無人。銜威謾虎視。豈圖一時快。禍機伏其裏。君看帝者  
師。猶取圯上履。古來蓋世功。唯從一忍始。

送良瑞子之關東

若耶溪上解醵身。去訪武陵洞裏春。洞裏春光與他別。桃花歷亂莫迷津。

冬夜讀書次韻

凍雲釀雪晚來冷。閒鎖衡門坐曲檣。風手摩燈光閃閃。茶權驅睡眼青青。甘貧久絕杯中物。守道猶存座右銘。此際無人同此意。終宵嗅盡寄梅馨。

雪美人

雪肌水骨別精神。斜立瑤階惱殺人。忽映旭光全體爛。匹如馬婦畢婚辰。

詠松賀某首座

三千丈。十八公。確爾培黃土。卓然摩碧空。鶴影巢而常睡月。龍形蟠而鎮吟風。枝葉聯綿兮寶林益茂。門庭廣大兮奇秀彌濃。轉步於今時。好爲遊席榜樣。延齡於劫外。宜佐國手神功。

立春

洞門寥落歲摧頽。也覺叢林春色催。寒向幽溪深處去。暖從細雨滴邊回。

元旦

磨出丹山新日月。展開霧海舊乾坤。照靈臺上君臣合。佳氣瑞光擁洞門。

甲子春入京

紫氣靄然籠帝鄉。山川何處不恩光。春風昨日鶯花地。又見公侯講武場。

長江永福寺呈西堂畫龍老師

曾慣江湖一老漁。絲綸千尺卷還舒。滿窓風月夜闌後。果見竿頭躍錦魚。

賀峯秀首座

一峯秀出鏡湖湄。影落清波展笑眉。眉間更泛半輪月。模得飲光活面皮。

訪道友單靈兄不遇

晚鐘聲裡扣禪扉。雲靜幽林人未歸。亦似山螢慰岑寂。輕輕故近檻前飛。

山內秀庵醫士至賦似

宿雲出岫鎖林關。香篆煙消晝正閒。剝啄一聲何處客。神仙尋藥石屏間。

訪山內秀庵

溪橋東去路縱橫。煙雨縹緲抹布城。不問高栖何處是。垂楊風外讀書聲。

次秀庵韻

自笑萍蹤未暫休。又隨鷗鷺此淹留。相逢方外舊青眼。不問人間新白頭。敲句閒雲窺石室。推窓皎月上林丘。繩牀坐久衣襟冷。品古評今趣更幽。

全

溪流一帶擁柴關。深院晝閒如處山。半日清談饒逸興。便知仙境在人間。

登山中光明寺禪師有虎佛通之日

此地曾聞棲大蟲。到今谷口起腥風。登臨誰是弄牙爪。巖石爛斑松蘚蒼。

深谷村值雨

二八應真深谷中。吟風嘯月打神通。神通變化人知否。鉢裏降龍雨色濛。

應馬場氏請喫茶

一掬芳心已十分。滿爐獸炭釀春薰。窓前暫拱推敲手。瑟瑟松濤側耳聞。

應鳳瑞力生招遊興聖寺次良範老師韻

世味何須說苦甘。一壺春酒助玄談。夜深客去餘情在。又汲清泉和月擔。

全

吟到佳篇如蔗甘。日高窓下未終談。臨還忽駭瘦肩重。恩顧半擔詩半擔。

賀萬休山堂頭再轉法輪併祝古稀

人間七十世無倫。况復重於轉法輪。鏤鑠脊梁堅於鐵。鬢髮頭髮白似銀。會栽松子多成拱。新買梅苗已帶春。好是萬機休罷主。逍遙物外養精神。

歸山偶成

江山萬里屬春陽。鐵錫依然歸興長。世上悲歡翁失馬。人間岐路客亡羊。守株猿鶴儘適健。護屋松筠尙鬱蒼。行李弛來蘿榻下。曲肱先入黑甜鄉。

次牧野國手見寄韻

知君氣岸自崢嶸。文采風流有執爭。雪霽山陰詩興動。雨收湖面畫情清。

青囊年古方書滿。丹竈日高仙藥成。贈我佳篇美於玉。卷舒驚嘆夜光明。

次黛山國手見寄韻

憶我雲遊日。山陰幾去留。漁村連水際。仙閣聳巖頭。帆影知風定。潮光認雨收。美君居勝地。隨意逞風流。

九月十三日靈公矣兄見訪。席上限韻各賦一聯作篇

祗樹園光晴晚霽。飄然吟錫此相尋。草間含露蟲聲靜。天際無雲月色深。滿酌何辭般若水。全身涵養菩提心。秋來未遂同盟會。不料今宵解索襟。

中秋清涼山賞月得心

風滿虛簷秋氣深。雲幃漸捲月初臨。城頭簫鼓人如海。誰識清涼物外心。

秋夕會友限韻

鼎坐論交益友三。浮榮濁富又何貪。蟲聲催句細於縷。燈影映杯青似藍。分衛到鹿野讓田寺投宿

鹿野園頭古梵筵。名區遠自竺邦傳。袒燈挑燭少林室。華雨翻香鷲嶺巖。王舍雲蒸須達飯。跋提河供闕伽泉。登臨親踐靈蹤地。誰識迦文現在前。

詠水仙賀默仙首座

會於林下寄生涯。瀟灑風姿絕點瑕。若把品題較群卉。翠衣皓首水仙花。

元日口號

客裡入新正。拜年絕送迎。殘尊猶臘味。曉雀已春聲。跌坐蒲床輭。繙經香案清。生涯隨處足。何必問蓬瀛。

同靈公遊山中光明寺

快友理輕策。飄然出市門。尋幽紅葉寺。拾句白雲村。心似猴攀樹。身如鶴脫樊。秋光隨處好。不覺到黃昏。

全

洞裏乾坤別。徜徉宜小留。松楓鬪紅碧。詩酒競賡酬。日暮雲歸岫。人閒鶴

浴流。忽因城鼓促。吟錫下林丘。

題小蓬萊

盆池不盈尺。先春手自栽。峯形拳石聳。溪勢細沙回。梅蕾籠蒼靄。松根帶碧苔。位置天然好。即是小蓬萊。

早春謁花山廟

風威凜烈拂僧杉。春淺村郊梅尚絨。不問仙陵何處是。雲間粉壁映松杉。

全

菩提山上埋仙骨。尼寺村邊葬翠裙。此日登臨煙霧裡。松濤猶作御歌聞。

送健庵生還伯耆

三歲伴吾遊有方。吟鞋探遍幾壇場。汲泉車瀨秋擔月。採藥丹丘曉履霜。孤館頻驚風樹夢。客窓常誦蓼莪章。一朝歸思難羈得。蜀魄聲聲淚數行。

六月十二日招飲青山氏

方是人間畏日天。壺中別伴小神仙。幾層雲嶂當窓淨。千頃秧田入檻鮮。談及稍闌雜諧謔。酒因既醉促狂顛。風情景趣真幽絕。不覺腰邊爛柯還。

西山早秋

車瀨橋西秋氣度。一番過雨劃炎涼。詩於不用意中得。禪自非思量外彰。雲拭青山華藏界。月臨紫陌寂光場。原來斯道無通塞。齷齪何須強主張。

九月十八日吳北老人拉默仙良平二子見訪。席上分玉鳳

金鸞四字得玉。

生平心事十分足。滿座佳賓皆不俗。贏得清貧展待殊。瑠璃盆上月如玉。西播道盟十八位相謀。冬夏更番轉不退。法輪今冬佛名之會。其發軔也。道舊靈公助化。賦寄。

道盟十八結芳隣。相輓相推膏願輪。風動法幢魔膽碎。雲磨佛日漢儀新。豈謀鬧熱隨時輩。欲爲慈悲化庶民。最愛天龍呵護德。自今不退轉麟麟。



歲晚寄林良平

歲月消磨世事灰。三冬未下坐禪臺。爲尋君屋寒梅樹。踈影先春開不開。  
歲抄廢林良平韻劫寄  
已往與將來。世事付劫灰。伯樂徒相馬。燕昭空築臺。飲君混塵俗。優遊養  
詩才。白水遠吟榻。寒月入酒杯。未接溪山句。因循歲云摧。暫袖推敲手。屈  
指待春回。

歲晚偶成

幽居無一事。歲晚只尋常。檢曆知春至。攤經守夜長。寒雲生敝屨。缺月照  
空牀。聞說市城外。匆忙人似狂。

賀大愚力生住月江院

難波江漲水花穠。漾漾鎔金月一痕。也識春風桃李岸。鯉魚幾隊躍龍門。  
詠月賀觀光首座

露作簾帷玉作姿。廣寒宮裏寄生涯。影涵萬水風清夜。光映半窓雲靜時。  
縱使人間看顯晦。何曾天上有盈虧。好將寂照圓明德。分化剎塵施智悲。

銀山途上

溪山一路曲如環。逐蝶看花興幾般。莫怪老僧吟脚緩。紅霞堆裏拾詩還。

三月五日發三田

行李飄然一轉蓬。任他世路幾窮通。滿城風雨桃花節。簑笠又爲雲水躬。

播州道中

攝嶂播山雲漠漠。斜風狂雨路重重。此行只爲酬盟約。不把羈愁容易訟。  
端手後一日待客

山房偶作

昨雨今晴已斷梅。滿山積翠畫圖開。誰知野衲存幽致。掃地焚香待客來。  
暫袖爲人提耳手。一雙不敢向他叉。門前只許清風到。眼底更無塵俗遮。

深院課經猿竊笋。幽庭掃地蝶追花。却嗤懶衲獨多事。故縛籬笆種木瓜。

次韻寄季溪諸子

季溪吟社悉仙陀。詩賦應追溫八叉。秀句新成彩虹落。劇論或吐怒濤遮。衆香臺畔人擎飯。宴坐石頭天雨華。最美精勤好時節。不關塵事亂如麻。

秋晚對酌

對酌閑謀釣小詩。桂花香裡放杯遲。滿腔澆得無纖个。吟到東山吐月時。

秋晚訪瑞松山默矣法兄

出門可必泣多岐。雲外逢迎別有期。瘦髮共驚成老態。吟肩却喜得新詩。紫芋黃栗秋肥日。眠鷺閑鷗盟熟時。雌伏雄飛非我事。逍遙只合守鶉枝。

春雪混梅花 分字得雪

品物由來交友別。松宜秋月梅宜雪。試把雪梅論色香。匹如滕薛爭優劣。自六瀨還波豆途上

節過清明雨始晴。溪山到處適詩情。鶯梭軋軋春如織。身輓柳絲花錦行。

季夏遊明善寺 次孝堂韻

一字精藍枕水涯。來遊使我豁吟懷。柳汀魚貫人牽艇。沙路雁行僧赴齋。簾影日高移竹个。箒痕風至落松釵。多情最愛槿花露。幽砌擎杯擬小娃。

次孝堂見寄韻以贈

九畹之蘭吐寄芬。佳種元非凡卉員。丹穎紫芽分林下。芳心如掬氣氤氳。幽賞吾亦同臭味。只愧無名堦草群。貞婦帶來紉作佩。高士采去綴人文。國香遠流播東西。鼻觀誰人曾不聞。最喜渲染懶衲袖。銅鴨不焚十日薰。無那佳朗動則差。心緒何日解糾紛。佳人咫尺無由至。想像醅醇幽叢雲。

松尾氏席上次孝堂韻

松陰深處善旋廬。太愛主賓情不踈。酒敵難支侵粥後。詩權何拒壓禪餘。饅飽同飽空心腹。驟雨全蘇涸轍魚。最愛人間煩熱少。優遊勝讀貝多書。

次龍留別孝堂

萍水曾從訂鷺盟。淡交何須孔方兄。烹茶山寺同雲坐。敲句村廬追韻成。  
悟葉扇飄秋漸冷。荷花玉碎恨將萌。滿囊佳什饒歸興。吟誦幾令猿鶴驚。  
神港寓目

陸飛車矣海飛船。寧美當年縮地仙。最愛高樓斜日外。寸眸平視五洲煙。

送神原精二

兵庫津頭白波起。摩耶山上黑雲多。縱令官路君難緩。奈此滿天風雨何。

同

緇素何論化與明。選場只在採精誠。沿海近來老漁遍。寧爲沙上鷓蚌爭。

宿美甘驛

地僻方知候氣殊。溪風吹袖粟生膚。羈窓驚見晨霜冷。無戶無家不擁爐。

伯州養光院主佛關力生。遠見訪余於常福。見惠雲箋。賦謝

不憚山路幾羊腸。惠貺雲箋一百張。道誼藹然誰得比。笑他好事謝三郎。

訪妙心寺主雪鷗道人宇浪途上

宿雨冥濛尙未晴。溪山一路訪同盟。滿眸詩料難題得。野草閑花不識名。

呈雪鷗道人

不逐時流隨世緣。八雲深處釋詩田。興來吟就題其畫。瀟洒心如出水蓮。

留別楚青居士併祝家門隆盛

鶴山龜井地名

最美君家阿母齡。九旬加二更康寧。鶴山龜井連環屋。桂子蘭孫秀滿庭。  
史筆宜編高士傳。世間應降老人星。禎祥如此緣何事。須識祖先餘德馨。

寄虎洲居士併謝外護

闔村長者老成人。最愛渾家能事親。國主聞賢曾下賞。鄉民懷德自歸仁。  
詩歌巧詠花兼月。禪誦飽參昏又晨。九夏相依雲水客。渥恩堪感夙緣因。

留別子高

不向官途不願榮。逍遙安分事經營。半林桑畝吟詩轉。數頃秧田帶卷耕。  
人訝晨門隱君子。誰知栗里老先生。一從蓮社同幽約。幾動別來雲樹情。

詠蓮蝦常福堂頭和尚轉法輪

不染淤泥不着塵。名花叢裡獨精神。戒香薰處擎跌座。心地平時見佛因。  
月照紅冠髻珠耀。風飄翠袖寶光新。人天百萬齊稽首。即是如來淨法身。

詠竹蝦宏道首座

此君挺出秀叢林。枝葉扶疎漸作陰。長夏引風風戛玉。半窓橫月月篩金。  
香嚴門外根塵脫。多福庭前位置深。祝見心空登第日。踟躕來宿九苞禽。

山寺納涼。分吾愛夏日長句。得吾字。

不逐炎塵向九衢。溪山深處寄微軀。最欽方外天恩渥。萬斛清風儘屬吾。

溪居雨夜。分閑敲棋子落燈花句。得敲字。

謝絕利名歸水泡。終年無客訪衡茅。幽溪一夜青燈雨。臥聽窓前風竹敲。

喜雨

風掠剝竿幡影輕。雨敲荷葉露珠傾。涼味寧唯醫病骨。萬金天賜及蒼生。

次韻寄小堀暢齋

賓鴻歸燕各隨緣。折桂登龍渾是天。却愧雲身閑不得。再逢何日伴詩筵。

七月二十四日夜買船自米子赴松江

扁舟解纜錦江秋。柔櫓搖邊彎月浮。是水是山分不得。模糊指點大根洲。

自平田赴杵築途上

秋風一路木綿花。雨後拋鞋步軟沙。應是山陰北風暴。松林楠比護人家。

咏松賀義範首座

天香山號  
桂林寺號

貞固寧同凡木期。丹丘幽處刷仙姿。老松原上成標格。嫩桂林中抽瑞枝。  
鶴影婆娑風爽夜。天香飄散月清時。品題寄絕有誰敵。寄作範公登第詩。

送萬兆典座歸省其師見龍力生

江南湖北遍遊蹤。看米淘沙道味濃。眠鷲社中驚客夢。啼鷓聲外促歸筇。  
水連天橋路千里。雲繞角盤山萬里。遙想父兒親密處。宇門浪捲見飛龍。

賀青龍諦觀師初轉法輪

多歲隨身七尺筇。一朝飛躍化青龍。大施悲雨三田地。遠覆慈雲六甲峰。  
枯橋衆生皆潤澤。敗焦諸種各蒙茸。法雷震矣天花落。正見魔軍悉服從。

題芭蕉二首

翻風青鳳尾。戰雨翠旗章。愛爾中虛質。能令夏日涼。  
貧道無雲箋。惡詩備爾題。丁寧風雨外。莫使污燕泥。

詠竹二首

一竿兩竿竹。翠葉拂雲長。九夏炎天日。爲人作蔭涼。  
秀出叢林外。清陰自蔚葱。虛心君子節。高標丈夫風。

歲晚

住山年已久。素志漸將灰。爲逐鷲鷗約。還遭猿鶴猜。病身兼竹瘦。春意與  
梅回。時向南窓下。盆栽手自培。

雪中友至分字得無

四山風色玉平鋪。帳裏擁爐護病軀。忽喜吟朋携酒至。先吞袖裏有詩無。  
次單靈老師來韻寄懷

送孝道子還鄉

憐爾三年從我遊。處擔簦處事尋幽。禪心磨礱天橋月。詩骨洗清覽水流。  
忽爲春風動歸思。却令弱柳結離愁。前程猶有雲煙在。縱到家山莫淹留。

送國榮子遊學東京二首

負擔任重出家兒。何物風標充我師。明日遠洋高着眼。半天蓮嶽玉匪屨。  
遊學東都人若織。多看志業半途歸。勉哉行解須綿密。莫使阿娘徒斷機。

出雲德林寺園池中摸作竹生鳥。因有此作。

偉矣大家疏鑿功。變還凹凸現神通。巖拳擎出寶輪塔。波而築成天女宮。風奏琵琶音斷續。月浮珠玉影玲瓏。分明擬得竹生鳥。彼此何須論約豐。

詠竹賀隨孝和尚初轉法輪做一始七終格

竹娟娟。蟲蟲。苗瀟湘。長淇澳。夕伴子猷。朝參多福。虛心凌歲寒。貞節慎幽獨。三春使龍孫生。九夏令鳳凰宿。別貯清風萬斛涼。掃除煩惱妄塵燠。

題太公望垂釣圖

幡然鶴髮老成人。閒把直鉤臨渭濱。誰料清癯竿樣手。扛來周鼎幾千鈞。

南簞納涼得涼字

高閣深沈庇夕陽。吟人環坐對幽篁。名炎利熱渾無到。占得清風萬斛涼。六月二十五日應請赴若狹國杉山清月寺。賦此以謝。

飄然携杖錫履約訪高齋。石虎莓苔覆。松龍雲霧埋。仙醴醫病骨。幽趣適

吟懷。道誼無由報。敲詩韻未諧。

陰歷八月初三日東京客舍會飲

新橋柳色暮煙含。陣陣水風吹浴衫。吟望占他奇絕處。富峰斜掛月初三。

賀文鏡力生建法幢於桃禪院

處處叢林凋落辰。西山樹色獨鮮新。桃禪院裏總金菓。車灑橋邊轉法輪。靈鑑分明挫魔外。旋機自在服人天。誰言濁世難行道。須識唯由志操純。

酬梵仙師見寄韻

追陪曾忝俱酬唱。一別飄然送歲華。欽子彩毫雄益富。愧吾素志輒多差。索居徒望江雲樹。離恨空添雲月花。幸爲夙因全未了。芝眉重接舊袈裟。

夏夜遇作

更鼓驅眠眠漸醒。續書窗外雨冥冥。朦朧未辨流螢點。却訝林間有限星。賀柏巖和尚建法幢於播之西教

占地播陽鎮四衢。開無盡藏展家風。舞兒煙水須磨月。一一拈來指掌中。

梅印雪潭號  
冰魂一朶水之湄。影印清波趣最奇。雪鎖懸崖人不到。此心唯有碧灣知。

祝丹波鐘阪墜道落成  
舉嶽金山盤半空。輪蹄商旅泣途窮。一朝忽見穿洞道。自在交通似禹功。

甲申春首三跋丹山因事作  
熟知寶海幾辛酸。又覺人間行路難。老衲未逃雲水責。三衝風雪度丹巒。

賀青蔭雪鴻師住永平寺  
久在要途看變通。維持綱紀泰元功。衆心悅可星拱北。物象歸依松向東。

清唳聲高雲際鶴。優遊跡潔雪中鴻。好拈傘大青青蔭。覆了扶桑萬樹叢。

次韻寄說三法姪  
垂考以何充後圖。一瓢春酒足歡娛。盆梅交發花紅白。不管書窓詩有無。

賀永澤瑞鳳力生初度

瑞鳳高巢海巖巔。自鐘靈秀會群仙。林間雲鎖龍池古。石鑱苔封蛇水腥。

好養精神餐沆瀣。永流思澤弄潺湲。豈唯甲子逢初度。更祝金剛壽萬年。

登瑞龍寺呈橘仙老師  
蹈翻錦水波千仞。睥睨立山雪萬層。端坐逍遙北溟上。竿頭應見化鯢龍。

神港次韻送孝道子遊東都  
身似虛舟烟岸橫。茫茫前路不分明。却憐若子遊蹤快。直截鯨波自在行。

春月  
墻柳飾金光焯灼。庭梅轉玉影徘徊。幽姿清絕描難就。匹似楊妃臨鏡臺。

病中偶作  
百事拋來奈懶何。絕無紅友助吟哦。晨昏洗竹梳松外。獨有清風伴月過。

賀九鬼大孺人古稀

壽筵高接古城門。水滿池塘花滿園。瑞靄輕籠南畝竹。祥煙半捲北堂萱。  
主人開宴周旋密。賀客傳觴笑語溫。坐久興闌春日暮。煌煌銀燭照金樽。  
極樂寺觀菊

不厭斜風寒雨狂。脩途蹈約到園莊。擁階艷色如迎客。圍坐幽姿似侑觴。  
白髮數莖愁裏老。青巾幾處夢中忙。爭如伴個陶靖節。隱逸安居極樂場。  
阿兄默矣訃至。尋忠山子寂

阿兄已逝阿兒歿。獨愧殘骸未埋訖。萬里霜天過雁稀。訃音往復魂勞髣。  
悼法兄默矣和尚。次法姪說三子韻

哀鴻昨夜落雲霄。報道棠棣華已凋。想看錦橋衡岳外。水聲樹影兩寥寥。  
近郊探梅

愛日誘人離市門。飄然輕展到江濱。水清淺處含風韻。烟淡濃時印月魂。  
玉骨立寒欺歲晚。水姿持操待春溫。吟情勃勃難題得。好就旗亭倒墨樽。

近郊散步

散步青郊路。吟情望欲迷。崖懸花壓屋。水退柳浸堤。田舍看風燕。寺村聞  
水雞。一瓢餘瀝在。不恨夕陽低。

瑞龍橋仙和尚封白紙一帳。贈金龍堂頭和尚。和尚便書却  
贈

把捉千年破釣竿。謝郎亦是打瞞頂。鈎頭餌朽魚何顧。徒費無文紙  
一番。

心月畫龍和尚次韻

放却自家破釣竿。白紙三張打瞞頂。我非千里同調友。鳥跡摸來又  
問安。

洞泉默禪師翁次韻

弄得南山不植竿。魚腮穿却厭瞞頂。一封簡牘虛空紙。萬象森羅字



字番。

寂光默矣和尚次韻

朝朝睡起日三竿。懶惰生涯打瞞頂。一道潺湲門外水。清時濯足濁時冠。

師次韻

元是謝家舊釣竿。論來把放亦瞞頂。江頭雨霽天如洗。漁笛一聲月一欄。

默應和尚遺稿終

明治四十二年十一月十三日印刷

明治四十二年十一月十六日發行

東京市芝區芝公園第五號地永平寺出張所

編纂兼發行者 弘津說三


東京市京橋區西紺屋町廿六七番地

印刷者 太田音次郎

東京市京橋區西紺屋町廿六七番地

印刷所 株式會社 秀英舍

1827  
277



327  
142

019860-000-9

327-142

默忝和尚遺稿全

蔭山 文龍/等編

M42. 11

ABG-0691



